

U ME PAISI

Mistretta è u me paisi e mi ‘nni vantu!
E sulu ‘nta stu cuozzu staiu cuntentu.
E siddu m’alluntano pi bisuogno,
mi chianci u cori e u piensu ogni momentu.

Cu a negghia e quannu u suli carcaria
e quannu chiovi e quannu pagghiazza,
è sempre bieddu stu paisi anticu,
ri lu me cori iddu e’ u miegghiu amicu!

Strati e vaneddi stritti e ’nturciuniati,
‘nto mienzu, chiesi ri ranni valuri,
e tutt’ attornu muntagni pi curuna,
‘nta l’aria corchi tuoccu ri campana!

Casuzzi accusturati a lu castieddu,
cu a spragghia, u iattaluoru e u purtieddu.
‘Nta chiazza casi antichi e maistusi,
cu scali, porti e ‘nfirriati priziusi.

Runni mi vuotu vuotu, c’è ‘na vista
ca mi inchi l’uocchi , la menti, lu cori!
I rinineddi firrienu cielu, cielu,
e ‘nte barcuni ririnu li sciuri.

Mistretta è u me paisi e mi ‘nni vanto!
E sulo ‘nta stu cuozzu staiu cuntentu.
E siddu m’alluntano pi bisuogno,
mi chianci u cori e u piensu ogni momentu.